

佛說栴檀樹經

失譯人名今附漢錄

聞如是一時佛從比丘在維耶梨國有迦羅越奉佛明法請佛供養佛呪願畢迦羅越於佛前肅然願聞法義佛便笑五色光從口而出繞身三匝還從頂入阿難整衣服叉手白佛言佛不妄笑笑必說法有所濟度願為說之天尊曰善哉阿難弘慈欲為一切開通法橋沙門之儀汝應其式今者演之諦聽執受彼國有五百人入海採寶置船步還經歷深

山日暮止宿預嚴早發四百九十九人皆引行去一人卧熟失輦仍遇天雨雪失去徑路窮厄山中啼哭呼天有大栴檀香樹樹神謂窮人言可止留此自相給衣食到春可去窮人便留至于三月啓樹神言受恩得全身命未有微報顧有二親今在本土實思得還願乞發遣樹神言善便自從意以金一餅賜之去此不遠當得國邑可得還汝鄉里窮人臨去問神言此樹香潔世所希有今當委遠願知其名神言不須問也窮人復言依蔭此樹

積歷三月今當委遠情懷悵悵若到本國當
宣揚樹恩神便言樹名栴檀根莖沒葉治人
百病其香遠聞世之奇異人所貪求不須道
也窮人還至故國中外親內親歡喜相樂時
王得病頭痛禱祀天地山水諸神病不消差
召醫省視惟當得栴檀香以護病當十便得愈王
即募求民間無有便宣令國中得栴檀香者
拜為封侯妻以小女時窮人聞賞祿重便詣
王所白言我知栴檀香處王便令近臣將窮
人往伐取香樹至到樹所使者見樹洪直枝

條茂盛華果煌煌人所希見心不忍伐不伐
者則違王命病不消愈伐之者中心隱隱踟
躕徘徊不知云何樹神便於空中言使伐之
但置其根耳伐已以人血塗之肝腸覆其上
樹自當生還復如故使者聞神言如此便令
人伐之窮人住在樹邊樹憚地枝標殺窮人
使者便與左右議言向者樹神言當得人血
肝腸以祠樹心為憮然不知當以誰賽此此
人今死便以當之則屠割取其肝血如神所
勅樹即更生車載所伐樹以還國中醫即進

藥王病得愈舉國歡喜王命國中人民其有病者皆詣宮門王出香藥給之病皆得愈王身康寧黎民無病舉國忻忻遂致太平阿難退坐稽首質言是窮人何無返復違樹神重誓佛報曰乃往昔惟衛佛時有父子三人其父奉五戒行十善持八關齋未曾懈怠大兒第十常於中庭空中燒香供養十方諸佛小弟愚癡不知三尊輒以衣履香上兄謂言此大重何以犯之弟起惡意誓言斷兄兩足兄復起念當拍殺弟父言汝二子諍使我頭痛大兒

報言願破我身為藥令父平損口不可妄故世世受罪弟興惡意欲斷兄足後果將人往斷樹兄欲拍殺弟今作樹神果因樹為體拍殺弟時國王頭痛者其父也奉齋精進故得尊貴時言使我頭痛後果頭痛各受其殃佛言罪福報應如影隨形佛廣為說身口意戒迦羅越則向須陀洹迹率將妻子以家資寶上佛各發道願佛說經竟迦羅越歡喜作禮佛說栴檀樹經